

Dumonda Bundi concernent mesiras (gallarias) per segirar la via chantunala da Sevgein a Riein

Dapi decennis è la via da colliaziun da Riein adina puspè serrada per il traffic sin via, quai pervia da crudada da crappa e crudadas da gripa pli grondas, cunzunt la primavaira durant la marschauna. La populaziun da Riein sa regorda anc bain dals onns 2009 e 2015. L'onn 2015 han ins numnadain stuì serrar la via per var 16 emnas. Quai ha mintgamai per consequenza, ch'i exista per il traffic tranter Riein e la val mo anc la colliaziun sur Valendau/Ober Dutjen – culms da Riein. Ins sto prender en cumpra in detur da 20 km cun ina differenza d'autozza dad 880 m ed impunder 55 minutas (colliaziun directa = 12 minutas). Questa via d'alp e da culm è en in nausch stadi.

La via da colliaziun directa han ins puspè stuì serrar ils 17 d'avrigl 2024 per motivs da segirezza. Ina bova pli gronda ha stratg cun sai glera, grip e grava, sco er las raits da segirezza e lur fixaziuns, ch'eran vegnidas construidas il 2015. Per motivs da segirezza na pon ins actualmain betg rumir la via, tge che la populaziun da Riein chapescha fitg bain.

La comunicaziun da l'Uffizi da construcziun bassa, district 6 Glion, chaschuna dentant dumondas. Ins ha sulettamain tschentà si tar il spartavias da Sevgein ina tavla cun scumond da traffic che signalisescha il detur sur Valendau/Ober Dutjen a Riein. Infurmaziuns supplementaras en las medias localas han mancà. I para, che mo quellas persunas sajan vegnidas infurmadas sveltes, ch'eran sa registradas per la comunicaziun via SMS sur il chanal d'infurmaziun. Sco gia l'onn 2015 n'ha pia la coordinaziun da las autoritads responsablas betg cuntentà.

La fracziun da Riein spera gia dapi pli ditg, che gallarias da protecziun vegnian tratgas en consideraziun en l'avegnir per auzar la segirezza da la colliaziun. Ina tala investiziun sa pajass probablamain a lunga vista, sch'ins considerescha, che las raits da protecziun actualas – ch'èn vegnidas construidas per 770'000 francs – èn ussa sa tschentadas sin la via.

Nossas dumondas a la Regenza èn las suandantas:

1. È la Regenza pronta da realisar ina colliaziun da via segira durant l'entir onn tranter Riein e Sevgein, quai cun construir gallarias da protecziun?
2. Giuditescha er la Regenza il sviament sur Ober Dutjen sco privlus e betg adattà sco detur (per exempel per scolars e scolars)?
3. Co èsi pussaivel da garantir meglier ina comunicaziun svelta en talas situaziuns extraordinarias?

Cuira, ils 23 d'avrigl 2024

Bundi, Brunold, Dietrich, Beeli, Brandenburger-Caderas, Candrian, Collenberg, Cortesi, Della Cà, Derungs (Domat), Derungs (Lumbrein), Epp, Furger, Hartmann (Schiers), Hartmann (Pragg-Jenaz), Heim, Jochum, Kasper, Lehner, Loi, Lunghi, Luzio, Menghini-Inauen, Messmer-Blumer, Michael (Castasegna), Mittner, Natter, Sax, Schutz, Sgier, Thür-Suter, von Tscherner, Wieland